

Prema sufijskoj hermeneutici, spoznaja nije samo neki logički, racionalni čin. Sufijski koncept spoznaje, pored tih elemenata, uključuje i stanovitu emocionalnu inteligenciju koja se u suvremenoj filozofiji iznova uzima u obzir. Bitna dimenzija sufijske interpretacije islamske epistemologije sadržana je u etičkom sadržaju. Na ontološkom planu spoznaja predstavlja dosezanje konačne zbilje na putu čovjekovog vraćanja Bogu. U tekstu Duhovna spoznaja salika Muhamed i Muamer Mrahorović nam u rubrici SAGLEDAVANJA predstavljaju sufijski metafizički, epistemološki i etički koncept spoznaje kako je on izložen u djelu „Četrdeset staništa“ (Maqamat-i arba'in) znamenitog sufijskog klasika Abu Sa'ida ibn Abi'l-Haira (5.h./11.stoljeće).

Stotine hiljada Turkinja uskraćeno je za posao u državnim ili općinskim službama zbog kemalističke zabrane nošenja hidžaba u javnim službama. Studentica Lejla Šahin nedavno se žalila Evropskom sudu za ljudska prava u Strazbouru na zabranu nošenja mahrame na univerzitetu u Turskoj. Evropski sud za ljudska prava je presudio protiv Lejle Šahin. U rubrici SAGLEDAVANJA pod naslovom Pravo na slobodu vjere Tore Lindholm izlaže sa stanovišta normativne političke teorije kritičku analizu presude Evropskog suda za ljudska prava u slučaju tužbe Lejle Šahin protiv Turske. Analiza Torea Lindholma za naše čitaoce može biti zanimljiva i s obzirom na pravne ali i političke implikacije vjerskih prava u bosanskohercegovačkom društvu na njegovom putu evropskih integracija. O tim pitanjima u

teološkom i povijesnokulturnom horizontu, u istoj rubrici, raspravlja tekst Enesa Karića pod naslovom Muslimansko iskazivanje vjere u Evropi danas. U istom osnovnom tematskom okviru u rubrici SAGLEDAVANJA pod naslovom Kuda idu američki muslimani? slijedi analiza današnje situacije u kojoj se nalaze islam i muslimani u SAD, a koju potpisuje Senad Agić, glavni imam Islamske zajednice Bošnjaka u SAD.

U rubrici MUALLIM u ovom broju objavljujemo sljedeće tekstove: Pričaonica (prilog metodici odgoja) – Rasim Tubodić, esej Željezo (Kur'an i fizika) – Azim Hodo, Uticaj porodice na formiranje ličnosti – Hasan Hilić i studiju Kritičko mišljenje kao praktično i teorijsko pitanje školskog obrazovanja – Mujo Slatina.

U rubrici HISTORIJA OBRAZOVANJA Almir Fatić piše o Prijevodima teoloških djela Bošnjaka sa orijentalnih na bosanski jezik, a u rubrici VELIKANI Ferid Dautović nam predstavlja život i djelo Profesora Muhamed efendije Fočaka (1907.-1978.)

U ovom broju MUALLIMOVU PROZU pod naslovom Džini; i ostali ispisuje Zilhad Ključanin.

Muallim i u ovom broju u rubrici REGLED predstavlja neka novija izdanja odnosno publikacije.

Dževad HODŽIĆ